

Oqaasiliortut Ataatsimiinnerat
Tallimangornermi februaarip tallimaanni 2010 nal. 10.00
Ilimmarfimmi Oqaasileriffiup ataatsimiittarfiani.

Peqataasut: Ellen J.Karlsen, Abia Abelsen, Stephen Heilmann, Eva Møller
Thomassen aamma Carl Chr. Olsen. Allatsi Katti Frederiksen

Oqaluuserisassatut siunnersuutit:

1. Tikilluaqqusineq

Siulittaasup ilisimatitsissutigaa *Oqaatsit minutsimut* KNR-ikkut aallakaatitassiap aallartilluarsimanera, kiisalu Oqaasileriffimmi sulisut Oqaasiliortunilu ilaasortat aallakaatitassioreeriarpata sinerissamit peqataasussat immiussillutik aallartissinnaangussasut.

2. Kingullermik imaqarniliap akuerineqarnera – akuerineqarpoq.

3. Ilisimatitsissutit

Ilitsoqqussaralugu Oqaatsit ulluata Oqaasileriffiup ukiut tamaasa aqqissuuttalersimasaa ukioq manna aamma pisarnertut aqqissuuteqqinneqarnissaa nalunaarutigineqarpoq, - tassani qulequtaritinneqassallutik **oqaatsinik ilinniarneq nutserisarnerlu.**

Nunavumi Inuit oqaasii pillugit isumasioqatigiisitsilluni ataatsimeersuarnissamut kikkut qaaqqusaasimani nalunaarutigineqarpoq, tassunga ilaallutik Oqaasileriffi pisortaq aammalu Oqaasiliortunut allatsi. Inuit Language Summit marsip 8-niit 12-ata tungaanut Iqalunni ingerlanneqassaaq.

4. Radarimut taaguutitut siunnersuut 'isiginiut'

Oqaasiliortut siunnersuummut akuersaarput, kisiannili taaguutitaap isiginiutip taaguutaareersoq radar mattutissanngikkaa erseqqissaassutigalugu; tassa oqaatsit makkua marloqiusanik taagorneqartut pissuseqatigalugit atorneqarsinnaaqqullugu: qulimiguulik ~ helikoper, oqarasuaat angallattagaq ~ mobil il.il.

5. Rådhusip kalaallisut taaguutissaa (21.01.10)

Apeqqummi matumani Oqaasiliortut eqqartorpaat kommunip rådhusillu ulluinnarni atuuffii suunersut, taakkualu tunngavigalugit aalajangerneqarpoq rådhus kalaallisut **kommuneqarfiup allaffianik** taaguuteqalissasoq, tassani kommunalbestyrelsip aalajangersaalluni ataatsimiittarfiattut aamma paasineqassalluni, sinnerili kommunekontorit illoqarfanni allani inissisimasut, tassa immikkut qinikkanit aalajangersaaviunngikkaluartut, **kommunip allaffiinik** taagorneqassallutik.

6. Sumiorpaluutit pillugit saaffiginnissut (febr.10)

KNR-imut saaffiginnissut Oqaasileriffimmullu ingerlateqqitaq, sumiorpaluutunik, kiisalu Oqaasileriffiup ingerlanneqarneranut tunngasumik isornartorsiuneq pillugu Oqaasiliortut isumaqarput tammasaaliineq inuit namminneq attanniartussaagaat, taamaattorli Oqaasileriffiup tungaaniit najoqqutassanik tikkuussinikkut ikiuuttoqarsinnaasoq. Ulloq manna tikillugu Oqaasiliortut (Tunumiusut Avanersuarmitullu) allattaatsimik pilersitsiniarlutik siunnersuummik tigusaqarneqanngillat. Ilisimatusarfimmi oqaasilerinermik atuartitsinermi sumiorpaluutit aamma pinngitsooratik sammitinneqartarput, ilinniartullu piomagunik sumiorpaluutunik aalajangersimasunik itisiliillutik samminnisinnaanissaminnut periarfissaqartitaareerlutik. Saaffiginnittup oqaatsinik sumiorpaluutinillu soqutiginnilluni oqallissaarinera tapersiinnartariaavoq, erseqqissaqqilluguli Oqaasiliortut Inatsisit tunngavigalugit, kiisalu allattaatsimik inatsit 1973-imeersoq malillugu sulimmata.

7. Allattaatsimik siunnersuuteqartoq (27.01.10)

Kalaallisut allattarnitsinni naqinneq t atortagarput d-mik taarserneqarnissaanik noqqaassuteqarluni siunnersuuteqartoq nassuiaanneqassaaq allattaatsip tunngavii 1973-imeersut malillugit allattaaserput aaqqissugaammat, tassanilu immikkut erseqqissaassutigineqassapput nipisiuinermi ilisarnaatit naqinnerillu atortakkavut immikkooruteqarmata, kiisalu allattaatsitsinni naqinnerup t-p allanngortinneqarnissaa siunertarineqanngimmat, taamaattumik foneminik immikkoorsitsisarneq nassuiaatigineqaannassaaq.

8. Killiffilersuutinut tunngasoq: kittoraateeraq.

Kalaallisut kittoraateeqqap kittoraatillu atuufii eqqartorneqareerlutik ilisimatitsissutigineqarpoq danskisut killiffilersuutit nutarterneqarlutik allanngortinneqarsimmata kalaallisut killiffilersuutit Oqaasileriffiup suliaa isumaliutissatut eqqarsaatigeqqinneqassasoq, taassumami tunngavigimmagu danskit allattaatsiminni killiffilersueriaasiat.

9. Tusarniaaneq: Center for Verdens Sprog

Islandimi centerimik pilersitsiniarneq Oqaasiliortunit tunngaviusumik taparserneqarpoq, taamaallaalli uagut nunatsinni suliniutiginiakkatsinnit aallerfiunnginnissaa piunasaqaatitut minnerpaatut tunngaviusariaqarluni, tassami kalaallit oqaasii eqqarsaatigissagaanni taakkununga ilisimatusarnerit taakkunungalugu tunngasunik sullissiniarnerit ullumikkut kipiluttunareersut allanut tunniunnissaat orniginanngimmat.

Inussiarnersumik inuullaqqusilluta

Carl Chr. Olsen
Siulittaasoq

Katti Frederiksen
allatsi